

Tutu nuu' ña ni ke'i San Pablo kua'an nda'a' ne ini xini Jesús, ne ndiee' ñuu Tesalónica

Ti'vi' ra cha'an' nia

1 ¹Yu'u Pablo, xiin' Silvano, xiin' Timoteo ndii, ti'vi' ndu cha'an' ndo'ó, ne ndiee' ñuu Tesalónica, ne nakayá xa'a' yuva' e' Ndiosí xiin' xa'a' xto'o e' Jesucristo. Na sañu'u' va na a ndo'ó, te na taxí tu a ña maní' koo xiin' ndo'.

Taxi' Pablo ña chindani Ndiosí xa'a' ne ini xini Jesús

²Sakuu' ichi' kii' ka'an ndu xiin' Ndiosí ndii, taxi' ndu ña chindani a xa'a' sakuu' ndo'. ³Te naka'an' chito ndu xa'a' a ndo' nuu' yuva' e' Ndiosí xa'a' saa xaa' ndo' chuun va'a xa'a' a ña ini ndo' xini ndo' Jesús, xiin' xa'a' ña xachuun' u'vi' va ndo' ña ndani ndo' inga ne yivi', xiin' xa'a' ña ita' ni'i ndo' nuu' ña ndiatu' ini e' xa'a' xto'o e' Jesucristo. ⁴Ñani ta'an' ndu, ndani Ndiosí ndo'ó, te xini ndu ña ni nakaxin a ndo'ó xa'a' mii' a. ⁵Kuachi ndii, kii' ni ka'an ndoso' ndu tu'un va'a nuu' ndo' ndii, süu' xiin' tu'un kuiti' ni xaa ndu a, süu' jaan' ndii xiin' ña ndiee' Ndiosí ni xaa ndu a, te sakan' tu xiin' ña ndiee' Espíritu Santo te kuni ne yivi' ña ña ndixa nduu' tu'un va'a jaan'. Te xini ndo' ña maní' ni kuu ndu kii' ni xika ndu tein ndo' xa'a' ña va'a mii' ndo'. ⁶Te ni xaa ndo' saa nii' xaa' ndu'u xiin' saa xaa' xto'o e'. Tee' ndee ni sando'o' u'vi' va ne yivi' ndo'ó ndii, ni natiin ndo' tu'un va'a jaan' nakuatia' nimá ndo' xaa' Espíritu Santo. ⁷Te nuu' ña jaan' ni nia'a ndo' nuu' sakuu' ne ini xini xto'o e', ne ndiee' ñu'u' Macedonia, xiin' ne ndiee' ñu'u' Acaya. ⁸Süu' ne ndiee' ikan' kuiti' xa ni xini so'o

tu'un va'a xa'a' xto'o e' ni xaa ndo', süu' jaan' ndii mii' ka kiku' tu'un jaan', sakan' ña xa ni xini so'o ne yivi' ña ini ndo' xini ndo' Ndiosí. Ndee küní a ña ka'an ka vi' ndu xiin' ne yivi' xa'a' tu'un jaan', ⁹kuachi ndii mii' ne jaan' ka'an saa ni natiin ndo' ndu'u xiin' saa ni nakoo ndo' ndiosí saka, te vitin xika' nuu' ndo' nuu' Ndiosí tiaku, ña nduu' Ndiosí xna'a. ¹⁰Te ka'an tu nia saa ndiatu' ndo' ña kiee Jesús, si'e Ndiosí, ndivi', te xaa a iin yivi'. Te Ndiosí ni sanatiaku ña'a', te ni sakakú a yoo' nuu' ña sando'o' Ndiosí ne ndiso' kuachi nuu' ku'un e'.

Ka'an Pablo xa'a' saa xachuun' ra tein ne ñuu Tesalónica

2 ¹Ñani ta'an' ndu, xini ndo' ña ni xa'an saka ndu mii' ndiee' ndo'. ²Te xini tu ndo' ña ni sando'o' ne yivi' ndu'u, te mii' tu ni kuu nia xiin' ndu ñuu Filipos. Ndisu Ndiosí ni taxi ndiee' ndu, te ni ka'an ndoso' ndu tu'un va'a nuu' ndo', tee' ndee ndiee' ni xikuita'nu ne yivi' nuu' ndu. ³Kuachi ndii, ña ka'an ndoso' ndu ndii, kuaxi a nuu' ña sana', ni ndee kuaxi tu a nuu' ña xanini kini, ni ndee kuaxi tu a nuu' ña xini xa'an'. ⁴Süu' jaan' ndii mii' Ndiosí ni sakuiso' chuun' ndu te ka'an ndoso' ndu tu'un va'a jaan', te nii' sakan' yoo a ka'an ndu, sakan' te nduku' ndu ña sakuatia' ndu ne yivi', süu' jaan' ndii nduku' ndu ña sakuatia' ndu Ndiosí, ña xini saa iin' nimá e' kuiti'. ⁵Te xini tu ndo' ña köo' kivi' ni ka'an ndatun' ndu nuu' ndo' te sakandixa' ndu ndo'ó, ni ndee ni xini xa'an' tu ndu ndo'ó te ki'in ndu xu'un' nda'a' ndo'. Xini Ndiosí ña xaa' ndu sakan'. ⁶Te ni ndee nduku' tu ndu ña koto ka'nu' ndee iin ne yivi' ndu'u, ni ndee ndo'ó uun ndee ka ne yivi' ndii, küni ndu ña saa nia sakan'. Tee' ndee te tianu' Jesús sania'á ichi' a nduu' ndu, te kumi' ndu ndiee' te tiachuun' ndu ndo'ó ndii, ni xaa ndu sakan'. ⁷Süu' jaan' ndii kuie ni kuu ndu xiin' ndo' ndee naa xaa' iin ña'a' ña' ndani a si'e a', te xito' va'a a. ⁸Te xa'a' a ña ndani xava'a ndu ndo'ó ndii, süu' tu'un va'a xa'a' Ndiosí kuiti' ni sania'á ndu ndo'ó, süu' jaan' ndii ndee kivi' ñuu ndu ni kuni ndu taxi tu ndu xa'a' ndo', sakan' ña ndani xava'a ndu ndo'ó, ndee naa nimá ndu nduu' ndo'. ⁹Te naka'an' ndo'ó, ñani ta'an' ndu, saa ni xachuun' u'vi va ndu, te ni saxavi xiin' mii' tu ndu ña xachuun' ndu nduvi' xiin' ñuu te sando'o' ndu ndee iin ndo'ó xa'a' ña tiaku ndu ki' ka'an ndoso' ndu tu'un va'a xa'a' Ndiosí nuu' ndo'.

¹⁰Xiní Ndiosí, te xiní tu ndo'ó saa ni xika ndoo ndu nuu' Ndiosí nuu' ndo'. Te xiní tu ndo' saa ni xachuun' ndaku ndu nuu' ndo'ó, ne ini xini ña'a'. Te kōo' ndee iin xa'a' ña kuvi tiin kuachi ne yivi' ndu'u. ¹¹Te xiní tu ndo' ña ni kuu va'a ndu xiin' i'in ndo' ndee naa xaa' iin yuva' xiin' si'e ra. ¹²Sakan' ni xandieni ndu ndo'ó, ni chi'ni kuei tu ndu ndo'ó xiin' kuento, te ni ka'an ndiee' ndu xiin' ndo' te kaka xata'an ndo' saa kuní Ndiosí, ña ni kana yoo' te kundiee e' mii' xa'ndia chuun' a mii' ndatun' koo' chukuu' kaa'.

¹³Ña jaan' na xikuiin ndu ña taxi' ndu ña chindani Ndiosí xa'a' a ña ni natiin va'a ndo' tu'un a kii' ni ka'an ndoso' ndu a nuu' ndo'. Te süu' ni natiin ndo' a ndee naa tu'un ne yivi', süu' jaan' ndii ni natiin ndo' a ndee naa tu'un Ndiosí. Te tu'un Ndiosí xna'a nduu' a, te xiin' tu'un jaan' xachuun' Ndiosí xiin' nimá ndo'ó, ne ini xini ña'a'. ¹⁴Ne ñani ta'an' i, kii' ndo'o' ndo' xaa' ne ta'an' ndo' ndii, ndo'o' ndo' saa nii' ni ndo'o' i'in t'ivi ne nakayá xa'a' Ndiosí, ne nduu' kuenta Cristo Jesús, ne ndiee' ñu'u' Judea, ni xaa ne judío, ne ta'an' ndu. ¹⁵Te ne judío jaan' nduu' ne ni xa'ni' xto'o e' Jesús, te suvi tu nia ni xa'ni' te ni ka'an tiakú tu'un Ndiosí xta'an', te suvi ni tu nia ni taxi' ndu'u. Te xaa' nia ña kuní Ndiosí, te ndasi' nia sakuu' ne yivi', ¹⁶sakan' ña taxi' nia ka'an ndoso' ndu tu'un va'a nuu' ndo'ó, ne tuku', te kaku ndo' nuu' kuachi ndo'. Te xiin' sakuu' ña xaa' nia jaan' ndii, so'o kuu' kua'a' ka kuachi nia nuu' Ndiosí, ndisu ndiee' va sando'o' ña'a' a.

Kuni ku'un ndi'e' ni tukuu' Pablo mii' ndiee' ne ñuu Tesalónica

¹⁷Ñani ta'an' ndu, tee' ndee ni kuxika' ndu nuu' ndo' ni xaa ne yivi' jaan' iin xa'a' ndii, yachi va ni kuni ndu nandiko' tukuu' ndu mii' ndiee' ndo', te koo ndu xiin' ndo', sakan' ña ñu'u' ndo' nimá ndu tee' ndee xika' ndiee' ndu nuu' ndo'. ¹⁸Ña jaan' na kuii' ni kuni ndu ku'un ndu mii' ndiee' ndo' jaan'. Yu'u, te nduu' Pablo ka vi' ndii, ki'in' ichi' ni xika i ku'un i mii' ndiee' ndo', ndisu ni nakasi ña ndiva'a nuu' ndu. ¹⁹Kuachi ndii, ñaáá xiní ndo' ña ndo'ó nduu' ne xaa' sakan' te ndiatu' ini ndu, xiin' ña kuation' nimá ndu, te kunduu tu ndo' ña kuvi ka'an va'a ndu xa'a' ndu nuu' xto'o e' Jesucristo kii' nandiko' tukuu' a? ²⁰Suu ndo'ó nduu' ne xaa' sakan', te ka'an va'a ndu xa'a' ndu, te suvi tu ndo' xakuatia' nimá ndu.

Ni tì'vi' Pablo Timoteo ñuu Tesalónica

3 ¹Xa'a' a jaan' na kuii', kii' nì kundieni ka ndu ndii, nì ndoo ndu kuento ña ndoo ndu ñuu Atenas, ²te nì tì'vi' ndu Timoteo, ñani e', mii' ndiee' ndo'. Te jaan' ndii, te xachuun' inga' xiin' ndu kuenta Ndiosí xa'a' tu'un va'a ña ka'án xa'a' Cristo nduu' ra. Ni tì'vi' ña'a' ndu te nakata ni'i ka ra ndo'ó nuu' ña inì ndo' xini ndo' Jesús, te sandieni tu ra ndo'ó nuu' ña jaan', ³koto ka kuxioo ndo' nuu' ichi' a xa'a' a ña sando'o' ne yivi' ndo'ó. Kuachi ndii xiní ndo' ña kuní a kundo'o' e' ña jaan'. ⁴Sakan' na kii' nì yoo ndu xiin' ndo' ndii, nì sakuni' ndu ndo'ó ña sando'o' ne yivi' yoo', te sakan' xna'a' ndo'o' e' vitin. ⁵Xa'a' a jaan' na kii' nì kundieni ka yu'u ndii, nì tì'vi' i Timoteo mii' ndiee' ndo' te kuní i naa' kusaa' ndikún ka ndo' ichi' Jesús. Kuachi ndii nì xanini' i ña tee' kuain' xa nì koyo ndo' nuu' ña xito' kua'a' ña ndiva'a' ndo'ó, te chuun ña nì xaa' ndu tein ndo' ndii, nì ndoñu'u' saka a.

⁶Ndisu kii' nì nandiko' Timoteo nì xa'an ra mii' ndiee' ndo' ndii, nì ka'an va'a ra xiin' ndu xa'a' a ña inì ndo' xini ndo' Jesús, xiin' xa'a' ña ndani ta'an' ndo'. Te ndatun' va naka'an' ndo' xa'a' ndu, te kuni kuní tu ndo' nuu' ndu ndee' naa kuní ndu'u' kuní ndu nuu' ndo'ó, nì kachi ra xiin' ndu. ⁷Ñani ta'an' ndu, sakan' na kuii' tee' ndee sando'o' va ne yivi' ndu'u, te sakusuchi' tu nia inì ndu ndii, nì xandieni Ndiosí ndu'u' kii' nì xiní ndu kuento ña ita' ni'i ndo' nuu' ña inì ndo' xini ndo' Jesús. ⁸Te vitin ndii, nì nakunaa va'a nimá ndu kii' nì xiní ndu ña ndikún ni'i ndo' ichi' xto'o' e' Jesús. ⁹Ndee xiní ka ndu ndee ña ka'an ndu xiin' Ndiosí kii' taxí ndu ña chindani a xa'a' ña nakuatia' xava'a' nimá ndu xa'a' ndo' nuu' a. ¹⁰Sakan' na kuii' nduvi' xiin' ñuu xikán ndiee' ndu nuu' a ña taxí a kuní tukuu ndu nuu' ndo', te saxinu ndu ña kuní ka kundani ndo' xa'a' a ña inì ndo' xini ndo' Jesús.

¹¹Na nunia' na yuva' e' Ndiosí, xiin' xto'o' e' Jesucristo ichi' te kuví xaa' tukuu ndu mii' ndiee' ndo'. ¹²Te na chindiee' na xto'o' e' ndo'ó te kua'nu ndo' nuu' ña ndani ta'an' ndo', te kundani naa kundani ta'an' ka tu ndo', te kundani tu ndo' sakuu' ne yivi' ndee' naa kundani ndu'u' ndo'ó. ¹³Te na chindiee' na a nimá ndo', sakan' te koo' kuachi ndo', te koo'

tú ndee iin xa'a' ña tiin kuachi Ndiosí, yuva' e', ndo'ó kivi' kii' nandiko' xto'o e' Jesucristo xiin' sakuu' ne nduu' kuenta mii' a.

Ka'án Pablo ña kuní a saa e' ña xtani Ndiosí

4 ¹Te vitin, ñani ta'an' ndu, ka'án nda'vi ndu xiin' ndo', te ndiaa yu'u' tu ndu ndo'ó xa'a' a ña ini e' xini e' xto'o e' Jesús ña kaka na kaka ndo' ña xakuatia' ndo' Ndiosí saa ni sania'á ndu ndo'ó. Tee' ndee xa xaa' ndo' a ndii, kuní a ña saa va'a ka ndo' a. ²Kuachi ndii xa xini ndo' ña ni sania'á ndu ndo'ó saa nii' ni sakuiso' chuun' xto'o e' Jesús ndu'u. ³Kuachi ndii kuní Ndiosí ña kaka ndo' saa kuní mii' a kuiti', sakan' na kuii' kuxioo ndo' nuu' ña xiin'. ⁴Kuní a ña i'in ndo' ndii, kundani ndo' ña kuu tuní ndo' xiin' iin' ndo', te kaka ndoo ndo' xiin' a. ⁵Te ndiöo' ini ka'an ta'an' ndo' naa xaa' ne tuku', ne xini yoo Ndiosí. ⁶Te mii' kuu ndee iin ndo', ni ndee küni xa'an' tu ndo' ñani ta'an' ndo' nuu' naa ña yo'o, sakan' ña sando'o' xto'o e' ne xaa' ña jaan' naa xa ni ka'an ndu xiin' ndo', te ni ndiaa yu'u' ndu ndo'ó. ⁷Kuachi ndii ni kana Ndiosí yoo' te saa e' ña xe'na', süu' jaan' ndii ni kana a yoo', te kunduu e' nditia a. ⁸Sakan' na kuii' yoo ka sanandiko' ña yo'o' ndii, süu' ña ka'án ne yivi' sanandiko' nia, süu' jaan' ndii, ña ka'án chuun' Ndiosí sanandiko' nia. Sakan' ña ña jaan' ni taxi' Espíritu Santo naá nimá e'.

⁹Te xa'a' a ña ndani ta'an' ndo' ndii, küni a ña ka'an ka i xa'a' ña jaan', sakan' ña mii' Ndiosí ni sania'á ndo'ó ña ndani ta'an' ndo'. ¹⁰Kuachi ndii ndani tu ndo' sakuu' ne ini inga' xini Jesús xiin' e', ne ndiee' ñu'u' Macedonia nda'a' ñuu ndo'. Ndisu ka'án nda'vi ndu xiin' ndo', ñani ta'an' ndu, ña kundani naa kundani ta'an' ka ndo'. ¹¹Te kaka naa xika' ndo' ña ndiee' maní' ndo' xiin' sakuu' ne yivi'. Te xa'a' ña ka'án kuachi nuu' mii' kuiti' ndo' chuun' xa'a' ndo'. Te sachuun' ndo' xiin' nda'a' mii' ndo' te kutiaku ndo' saa nii' ni ka'an chuun' ndu xiin' ndo' kii' ni jaan'. ¹²Te koto ka'nu' ne ini xini Jesús ndo'ó kii' küni nia xaa' ndo' ña jaan', te kötiin ndiaa ndo' ndee iin ne yivi'.

So'o saa a kivi' ña nandiko' xto'o e'

¹³Ñani ta'an' ndu, kuní ndu ña küni ndo' saa ndo'o' ne xa ni xi'i, te küsuchi' ini ndo' xa'a' nia ndee naa xaa' ne ndiätu' ini ña kundiee nia mii' ndu'u' Ndiosí. ¹⁴Kuachi ndii kandixa'

e' ña ni sanatiaku Ndiosí Jesús, te sakan' tu sanatiaku a ne ni xi'i, ne ini xini Jesús, te nduuin nia xiin' a ndivi'. ¹⁵Sakan' na kuii' ka'an ndu xiin' ndo' vitin ña ni ka'an xto'o e' xiin' ndu ndii. Yoo', ne tiaku kii' nandiko' a ndii, ki'in ichi' e' nuu' ne xa ni xi'i jaan'. ¹⁶Kuachi ndii mii' xto'o e' Jesús keta ndee ndivi' ka'an chuun' ti'e' a xiin' tachi' yu'u' a, te ka'an ti'e' tu iin ángele kuu' nuu', te nde'i ti'e' tu iin ndachuun' Ndiosí. Te ne ni xi'i, ne ini xini Cristo ndii, xi'na ka nia natiaku kii' sakan'. ¹⁷Sakan' te yoo', ne tiaku kii' sakan', ne ni ndoo ka ndiee' ndii, iin xita' inga' tio' Ndiosí yoo' xiin' ne jaan', te ku'un e' nuu' viko', te nduuin e' xiin' xto'o e' tein tachi'. Te sakan' kundiee e' xiin' a ndee ndi'i ni kivi'. ¹⁸Xa'a' a jaan' na kuii' sandieni ta'an' i'in ndo' xiin' tu'un yo'o'.

5 ¹Ñani ta'an' ndu, kuni a ña ka'an i xiin' ndo' amaa kuiti' nandiko' xto'o e' Jesús, ni ndee kuni tu a ka'an i xiin' ndo' saa kuiti' xka'ndia a. ²Kuachi ndii xa xini kaxi' ndo' ña kii' xaa kivi' ña nandiko' xto'o e' ndii, iin xaa ki'i' kuiti' a ndee naa xaa' iin te kui'na' ñuu. ³Kii' ka'an ne yivi' ndii: "Ndiee' mani' e', te koo' a yoo'", kachi nia, sakan' te iin kixin kuiti' ña sandoñu'u' ña'a' ndee naa iin kuaxi kuiti' ña ndo'o' iin ña'a' kii' xito' sakaku' a. Te koo' a kuví saa nia, te kaku nia. ⁴Ndisu ndo'ó, ñani ta'an' ndu ndii, yoo sa'vi ini ndo' xa'a' kivi' jaan' te tjin nianí a ndo'ó ndee naa tiin' nianí te kui'na' ne yivi'. ⁵Sakan' ña sakuu' ndo'ó ndii, xa tuvi' nuu' nimá ndo' xaa' ñu'u' Ndiosí, te xika' ndo' ndee naa iin ke'in' nduu' a. Te nduu' e' ndee naa ne xika' ñuu, ni ndee nduu' tu e' ne xika' iin yavi. ⁶Sakan' na kuii' taxi' e' ña koo sa'vi ini e' xa'a' kivi' jaan' naa xaa' ne ini xini Jesús, süu' jaan' ndii koo tu'va e' xa'a' a, te koo ñu'u' ini tu e'. ⁷Kuachi ndii, ne yoo sa'vi ini xa'a' kivi' jaan' ndii, kixin nia ñuu, te xi'i' tu nia vino ñuu, te xini nia. ⁸Ndisu yoo', ne xa tuvi' nuu' nimá xaa' ñu'u' Ndiosí ndii, kuni a ña koo ñu'u' ini e', te tiasi ña ini e' xini e' Jesús yoo', xiin' ña ndani ta'an' e'. Te ña ndiatu' ini e' sakakú Jesús yoo ndii, nduu' a ndee naa ti'e' ña kasi xini' e'. ⁹Kuachi ndii, süu' ni nakaxin Ndiosí yoo' te sando'o' a yoo', süu' jaan' ndii ni nakaxin a yoo' te sakakú a yoo' xa'a' ña ni xaa xto'o e' Jesucristo, ¹⁰ña ni xi'i a xa'a' e', te kundiee inga' e' xiin' a naa' ni xi'i e' uun naa' tiaku e'. ¹¹Sakan' na kuii' sandieni ta'an' i'in ndo', te chindiee' ta'an' tu ndo' ña ku'a'nu ka ndo' nuu' ichi' Jesús naa xa xaa' ka ndo'.

Ndiaa yu'u' Pablo ne iní xini Jesús saa kuní a kaka nia

¹²Ñani ta'an' ndu, ka'an nda'vi ndu xiin' ndo' ña koto ka'nu' ndo' ne xachuun' u'vi tein ndo' chuun nuu' xto'o e', ña xito' nia ndo'ó, te sania'á tu nia ndo'ó ña ndikún ndo' ichi' a. ¹³Te tiin ka'nu' va ndo' ne jaan', te kundani va tu ña'a' ndo' xa'a' chuun ña xaa' nia. Te kundiee mani' xiin' ta'an' ndo'. ¹⁴Ñani ta'an' ndu, ka'an nda'vi tu ndu xiin' ndo' ña kani kuento ndo' ne suxan', te sandieni tu ndo' ne nuu' nimá, te chindiee' ni tu ndo' ne itia' iní, te sakan' tu kuie kuu iní ndo' xiin' sakuu' ne yivi'. ¹⁵Chuun xa'a' va ndo' ña ndee iin ndo' sanandiko' ña nia'a xa'a' ña nia'a ña xaa' ne yivi' xiin' ndo', süu' jaan' ndii kaka ndo' xaa' ndo' ña va'a xiin' ta'an' ndo', te iin kachi tu saa ndo' a xa'a' sakuu' ne yivi'.

¹⁶Kuatia' na kuatia' iní ndo'. ¹⁷Te ka'an na ka'an ndo' xiin' Ndiosí. ¹⁸Te taxi na taxi' ndo' ña chindani a xa'a' sakuu' ña ndo'o' ndo'. Kuachi ndii ña jaan' nduu' ña kuní Ndiosí saa e' xa'a' a ña iní e' xini e' Cristo Jesús.



© 1996 David C. Cook

Ka'an naa ka'an e' xiin' Ndiosí, te taxi na taxi' e' ña chindani a xa'a' sakuu' ña ndo'o' e' (5.18)

¹⁹T̄īasi ndo' ña kuni saa Espiritu Santo. ²⁰Te s̄anuu' tu ndo' ña ka'án tiakú ne yivi' xaa' Espiritu Santo jaan'. ²¹Ndisu sakuaan ndi'i ndo' a te kuni ndo' naa' Espiritu Santo jaan' nduu' ña saka'án tiakú ne yivi' jaan' uun süvi' a. Te ña va'a kuiti' nat̄iin ndo'. ²²Te na kuxioo tu ndo' nuu' sakuu' nuu' ña n̄ia'a.

²³Na taxi na Ndiosí ña mani' koo xiin' ndo', te na ndasandoo ndi'i xachi' a ndo'ó. Te sakan' taxa'a a kanii' ndo', naa kuu' espiritu ndo', xiin' nimá ndo', xiin' ñu'u' nde'i ndo', te köo' ndee iin xa'a' ña tiin kuachi' a ndo'ó kii' nandiko' xto'o e' Jesucristo. ²⁴Sakan' ña Ndiosí, ña ni kana yoo' ndii, xachuun' ndaku a te saxinú a sakuu' ña jaan'.

Ndeji' Pablo ne ini xini Jesús

²⁵Ñani ta'an' ndu, ka'an ndo' xiin' Ndiosí xa'a' ndu. ²⁶Chito nuu' ta'an' sakuu' ndo' kuenta Jesús, te xiin' ña jaan' nakuatu ta'an' ndo'. ²⁷Ka'án chuun' i nuu' ndo' saa kuní xto'o e' ña ka'vi' ndo' tutu yo'o' nuu' sakuu' ñani ta'an' e'. ²⁸Te na sañu'u' na xto'o e' Jesucristo ndo'ó. Sakan' na kundu a.